



Tužilaštvo/Tužiteljstvo Brčko distrikta Bosne i Hercegovine
Тужилаштво Брчко дистрикта Босне и Херцеговине
Prosecutor's Office of the Brcko District of Bosnia and Herzegovina

<http://jt-brckodistriktbih.pravosudje.ba>



Trg pravde 10, 76100 Brčko distrikt Bosne i Hercegovine; web: jt-brckodistriktbih.pravosudje.ba; tel: 049/217-227; faks: 049/219-088; e-pošta: jtbtd@jtbtd.ba
Трг правде 10, 76100 Брчко дистрикт Босне и Херцеговине; web: jt-brckodistriktbih.pravosudje.ba; тел: 049/217-227; факс: 049/219-088; e-пошта: jtbtd@jtbtd.ba

SAOPĆENJE ZA JAVNOST

Dokazano ubistvo iz koristoljublja Aladinu Biseru 17 godina zatvora

20.1.2023. godine

[\(link\)](#)

Tužilaštvo Brčko distrikta BiH dokazalo je optužbe protiv Aladina Bisera (38), optuženog za ubistvo starije osobe počinjeno u Jagodnjaku kod Brčkog, u maju 2021. godine. Nakon suđenja pred sudovima distrikta Brčko, on je pravosnažno osuđen na 17 godina zatvora za ubistvo iz koristoljublja, pošto je dokazano da je obrtnika Fethiju Mihmića lišio života s ciljem da zadrži prevarno pribavljen novac od žrtve.

Biser je procesuiran i pravosnažno osuđen, jer je ciljem da zadrži prevarno pribavljen novac od žrtve, kako bi izbjegao da ga vrati, planirao, pripremio, a zatim i počinio ubistvo Mihmića. Kako se navodi u optužnici, koju je Tužilaštvo u cijelosti dokazalo, Biser je 31. maja 2021. godine, oko 07,30 časova, vozilom odveo Mihmića u naselje Jagodnjak, a zatim ga na makadamskom putu, koji to naselje povezuje s Donjom Skakavom, izveo i poveo u obližnju šumu, gdje mu je udarcima štilom za sjekiru u predjelu glave, desnog ramena i lijeve šake nanio povrede usljed kojih je nastupila smrt žrtve. Ubistvu iz koristoljublja prethodilo je dugogodišnje poznanstvo optuženog i žrtve, pri čemu je optuženi u posljednje tri godine, lažno se predstavljajući kao geometar, konstantno uzimao novac od Mihmića da bi mu navodno osigurao kupovinu nekretnine od distrikta Brčko. U namjeri da sebi pribavi protivpravnu imovinsku korist, lažno mu je prikazivao da može osigurati potrebne dozvole i putem geometra ubrzati postupak, ali da mu mora davati novac za navodne takse, postupke licitacije i geodetsku naknadu. Kako mu je Mihmić povjerovao, u više navrata mu je predao oko 80 000,00 KM, pri čemu ga je Biser radi plaćanja kontaktirao putem telefona, lažno se predstavljajući kao geometar Svetozar Vasiljević.

Nakon ubistva, Biser je ubrzo otkriven i uhapšen, a 2. juna 2021. godine predat je Tužilaštvu Distrikta na daljnje procesuiranje tokom kojeg mu je odmah određen pritvor. Trajanje pritvora prema Biseru, na prijedlog Tužilaštva, produženo je i nakon podizanja optužnice 26. novembra 2021. godine, kojom je optužen za krivično djelo Ubistvo, iz koristoljublja (*iz člana 163 stav 2 tačka 4 Krivičnog zakona Brčko distrikta BiH*). Kao i u najvećem broju ranije rasvjetljenih ubistava u Brčkom, počinitelj je i u ovom slučaju brzo otkriven, a istraga protiv njega okončana je podizanjem optužnice za manje od šest mjeseci. Nakon glavnog pretresa, on je u septembru prošle godine pred Osnovnim sudom Brčko distrikta BiH nepravosnažno osuđen na kaznu zatvora u trajanju od 19 godina. Po žalbi odbrane, Apelacioni sud distrikta Brčko nedavno je izmijenio prvostepenu presudu u odluci o kazni pravosnažno osudivši Bisera za ubistvo iz koristoljublja na zatvorsku kaznu od 17 godina. Time je ovaj slučaj dobio konačni epilog pred pravosuđem distrikta Brčko, nakon što je cjelokupan postupak, uključujući tužilačku istragu, glavni pretres i žalbeni postupak pred sudovima, okončan za nešto više od jedne i po godine.

**GLAVNI TUŽILAC
ZEKERIJA MUJKANović**

KRIVIČNO DJELO I
ZAPRIJEĆENA KAZNA

UBISTVO

iz člana 163 stav (2) Krivičnog zakona Brčko distrikta BiH

Kaznom zatvora najmanje deset godina ili kaznom dugotrajnog zatvora kaznit će se:

4) **ko drugoga liši života iz koristoljublja [...]**